



1171146\$4

| | | | |
|------------------|----------------------------|-------------------|------------------|
| Proposamen-mota: | BANDOA | Espediente zk.: | BANDO / 2018 / 1 |
| Alorra: | Alkatetzako Alorra | Proposamen-kodea: | |
| Departamentua: | Alkatetzako Administrazioa | | |

2018KO SANFERMINETARAKO BANDOA

----- TESTU PROPOSATUA -----

«Iruñeko Udal Txit Garai, Leial eta Agurgarriko ALKATE UDALBURUAK honako hau ematen du aditzera:

SANFERMINAK Hiriaren eta bertara etorri ohi diren bisitari oren alaitasunaren benetako isla izan daitezen, eta festa hauen ohiturei eta gizalegari eusteko asmoz, eta, betiere, festa hauek dituzten ezaugarriak direla-eta behar bezain zorrotz jokatu, Alkate Udalburutza honek honako xedapen hauek ematen ditu argitara, jende orok ezagutu eta bete ditzan:

LEHENA

UDAL ORDENANTZAK ETA BESTE ARAU BATZUK

Hona hemen, zerrendaturik, derrigorrean bete behar diren zenbait manu berezi:

1.1.- Ostalaritzako establezimendu guztiek begi-bistan paratu beharko dute prezioen zerrenda, erraz lokalizatu eta irakurtzeko moduan.

1.2.- Mahai, mahaitxo eta terrazetan emandako zerbitzuetan, hartutako janari-edariei dagokien tiketa edo ordainagiria entregatu beharko da, eta hori baliogabetu egin beharko da ordaindu ondoren.

1.2.1.- Mahaiak zein mahaitxoak dituzten terrazak, ikuskizun-jolasak, salmenta-postuak, agertokiak eta antzekoak dituzten lekuak baldintza egokietan mantendu behar dira, higienerari eta osasungintzari dagokienez, halako eran non behar bezala garbitu eta haietatik hondakinak jasoko baitira, indarra duten ordenantzetan ezarritako betekizunak oro gordeta. Berariaz debekaturik dago lekuak garbitzean zikinkeria eremu publikora bota eta jaso gabe uztea.

1.2.2.- Elikadura-jardueri lotutako erantzukizuneko aitortpenak ekainaren 30etik uztailaren 5era aurkeztuz gero, ez dute uztailaren 15era arte indarririk izango. Horren arrazoia da ez dagoela Administrazioaren aurretiko kontrolik, eta osasunerako arriskua izan daitekeela sanferminetara bisitari piloa datozela kontuan hartuta.

1.3.- Elikagai eta edarien salmentarako eta kontsumorako jarduera guztiek zehatz-mehatz bete beharko dituzte higienerari nahiz osasungintzari dagozkien arauak. Haien titular direnei gogorarazten zaie komunak irekita eduki behar dituztela beti, baina, bereziki, sanferminetan, bai eta, jarduerak irekiak diren bitartean, era egokian erabiltzeko beharrezkoak diren osagarri guztiez horniturik ere.



1.4.- Runa parkeko Feria-lekuan, Antoniutti parkean eta Basotxoan paratzen diren jolas- eta ikuskizun-postuek eta baimena jasotzen duten guztiek zein haiei atxikitako karabana-ibilgailuek zehatz-mehatz beteko dituzte halakoei aplikatu beharreko segurtasunari eta osasungintzari buruzko arauak, eta, nolnahi ere, dagozkien baimenetan azaldutakoak.

Halaber, baimendutako instalazioen titularrek erantzukizuna edukiko dute muntatze-lanetan errespetatzeko hala lorategi-aldeak eta zuhaitzak –eta azken horien kasuan haien aireko parteak zein lurrazpikoak– nola hiri-altzariak, zoladurak eta eremu publikoko elementu komunak, halako eran non beren gain hartuko baitute behin desmuntatze-lanak eginda elementu horiek guztiak egoera onean uzteko erantzukizuna.

Baimendutako instalazioen ondorioz beharrezkoa balitz eremu publikoan ezein esku-hartze publiko egitea, elementuak babesteko edo oinezkoen joan-etorriak modu irisgarrian hobetzeko, kasuan kasuko instalazioaren titularrak hartu beharko du bere gain esku-hartze horiek egiteko erantzukizuna.

1.4.1.- Runa parkeko Feria-lekuan, Antoniutti parkean eta Basotxoan paratzen diren jolas- eta ikuskizun-postuen zein baimendutako guztien titularrek behar bezala garbituko dituzte leku horiek, haietatik hondakin solidoak gaika bereizita jasoko dituzte eta ur zikinak saneamendu-sarera hustuko, betiere indarra duten ordenantzetan ezarritako baldintzak oro beteko dituztelarik.

1.5.- Tabakoa edo horren produktuak saldu edo banatzeko legezko baimena duten establezimendu edota jardueretan, kartelak paratu beharko dituzte, jendaurrean ikusgai, non adieraziko baitute debekaturik dagoela 18 urtetik beherakoei tabakoa saltzea.

1.6.- Festek iraun bitartean eremu publikoan saltzeko baimenak eta baldintzak Herritarren Segurtasuneko eta Elkarbizitzako gaien ardura duen Zinegotzi Ordezkararen ebazpen baten bidez arautuko dira.

Salmenta mota horretarako xedatu denaren kontrako arau-haustek arau aplikagarriekin bat zehatuko dira, behin salgaiak badaezpada konfiskatu eta, beharrezkoa bada, saltzeko baimena kendu eta gero. Konfiskatutako salgaiak ez dira itzuliko, gutxienez, festak bukatu arte.

Debekaturik dago, aldi baterako saltokietan edota kaleko jardueretan, piercingak eta tatuajeak egitea gorputzean –azala zulatu beharra edo beharrik eza gorabehera– eta produktu kosmetikoak saltzea, produktu horiek gaixotasunak sendatzeko edo haiei aurea hartzeko balio dutelakoan saltzen badira edo etiketetan haiek merkaturatzeko exijitutako gutxieneko informazioa ekartzen ez badute. Debekua da, baita ere, kontsumitzaileen segurtasunari eta osasunari arriskua ekar liezaiekeen edozein produktu saltzea.

1.7.- Debekaturik dago baimenik gabeko propaganda saldu edo banatzea, iragarle nor den eta pertsona edo entitate hori izanen dela erantzule, edo legez iturburua nor, eta hori bera. Halaber, debekaturik dago piroteknia-elementurik edo lehegairik saldu eta erabiltzea, salbu berariaz baimendurik daudenak.

Debekaturik daude mota orotako publizitate-jarduerak, ibilgailuetatik eta ibilgailuen bidez egindakoak barne, salbu berariaz baimendurik daudenak.

1.8.- Ezin izanen da inolako jardueratan aritu hirigintza-, osasun- eta zerga-baldintzak betetzen ez dituzten lokaletan (irekitzeko lizentzia edo, bestela, erantzukizuneko aitortpena eta alta Jarduera Ekonomikoen gaineko Zergan edo Lizentzia Fiskalean). Elikagaien edota edarien kasuan, agintaritzaren



agenteeek salatuko dituzte arauak urratzen dituztenak, eskainitako gaien konfiskazioa ezertan galarazi gabe, horrelakorik bidezkoa izanez gero. Halaber, kasuan kasuko udal-zerbitzuek zehatu eta kenarazi ahalko dituzte eremu publikoan baimenik gabe paratzen diren mahaiak eta mahaitxoak.

1.9.- Erabat debekaturik dago kalez kale saltzen diren haurrentako puxikak gas deflagratzaileez edota sute- nahiz leherketa- edo intoxikazio-arriskua eragin ahal duten gasez betetzea.

Aipatu puxika horien salmentan aritzen direnek ziurtatu beharko dituzte erabilitako gasaren ezaugarriak eta jatorria, eta onartu datu horiek egiaztatze aldera udaltzainek edo Babes Zibilekoek eginarazi ahalko dizkieten froga guztiak.

1.10.- Iturri publikoak eta urmaelak edo aintzira artifizialak ezin izanen dira erabili garbiketarako edo bainuetarako edota berezko dituzten xedeez besteko helburuetarako, eta debekaturik dago haien funtzionamendu-sistema manipulatzeko. Gomendatzen da, baita ere, ez bainatzea Iruñeko udal-mugarteko ibai eta erreketako uretan.

1.11.- Haur-jolasen eremuetan, debekaturik dago toki horiek berezko dituzten jardueraz besteko edozein egitea. Ezin izanen da ez eremu horiek okupatu, ez beraietan kanpatu ez ezein salmenta mota egin ere.

1.12.- Zehapenak paratuko zaizkie eremu eta gune publikoak zikintzen dituztenei eta, bereziki, beirazko ontziak bertan utzi edo hausten dituztenei eta kalterik eragin dezaketen bestelako ekintzak gauzatzen dituztenei.

1.13.- Hondakinak sortzeari aurre egitea xede harturik, eta horiek zein haien kudeaketak giza-osasunean zein ingurumenean eragiten duten kaltea arintze aldera, ostalaritza arloko establezimendu guztietan edalontzi berrerabilgarria –eta ez botatzekoa– erabiltzea gomendatzen da. Neurri horren bidez, halaber, bertakoen eta bisitarien arteko elkarbizitza hobetu nahi da, denon artean geure eginez festak jasangarriagoak egiteko ardura.

Hori horrela, Udalak eskura dituen behar beste neurri jarriko ditu, hondakinak gutxitu daitezkeen bermatzeko, ostalaritzako establezimenduen eta bestelako festaguneen eskura jarrita edalontzi berrerabilgarriak kudeatzeko zerbitzua.

Halaber, establezimendu pribatuak premiatzen ditu hondakin gutxiago sor dezaten, Udalak eskaintzen duen edalontzi berrerabilgarrien sistema edo tankera horretako beste sistema bat (edalontziak banatu, bildu eta itzultzekoak) erabiliz.

1.14.- Lorategi eta parkeak errespetatu behar dira, eta, bereziki, arboladia eta hiri-altzariak –hala finkoak nola aldi baterakoak–, eta debekaturik dago honako hauek egitea:

- Landare-elementuak manipulatu edo hondatzea.
- Hondakinak, gantzak, produktu kaustiko edo kaltegarriak, xaboiak edota olioak arbolaren txorkoetan edo berdeguneetan botatzea.
- Linea elektrikoak edo horien erregistroak arbolaren instalatzea edo haien kontra bermatzea.
- Arbolak, zuhaixkak edota horien parteak inausi edo moztea, bai eta arbolak Udalaren baimenik gabe lekuz aldatzea ere.



1.15.- Leku publikoetan, zakurrak uhalez loturik ibiliko dira, horiek kontrolatzeko erantzule diren pertsonak gidatuta. Arriskugarriak izan daitezkeen zakurrek muturrekoa eraman behar dute, eta bi metro luze baino gutxiagoko uhal edo kate batez gidaturik joan, bai eta halako animalien kasuan berariazko arauak ezartzen dituzten gainerako betebeharrak bete ere.

Arriskugarriak izan daitezkeen beste animalien kasuan, horien jabeek behar diren neurriak hartuko dituzte herritarrei arriskua galarazteko.

1.16.- Ziudadelako barrutia jendearendako itxita egonen da sanferminetan, berariazko ekitaldietarako izan ezik.

1.17.- Udalei esleitu zaizkien eskumenen babespean, sanferminetan, ixteko orduak eta, halakorik bada, ikuskizunak eta aisia-jarduerak amaitzekoa, goizaldeko 06:00ak izanen dira, taberna, kafetegi, jatetxe, taberna berezi, ikuskizun-kafetegi eta joko- zein bingo-areto gisara jarduten duten establezimenduen kasuan, 2018ko uztailaren 7tik 15era bitartean (bi egun horiek barne); eta goizeko 07:00ak, diskoteka eta dantzaleku zereginetan aritzen diren establezimenduen kasuan –betiere 201/2002 Foru Dekretuaren 4. artikularekin bat jendez husteko denbora osagarria ere izanen dela–; edozein kasutan, hiru orduko tartea utzi beharko da, bederen, itxi eta irekitzeko orduen artean, lokala eta terraza – halakorik badu– behar diren baldintzetan egon daitezen, higienari eta osasungintzari dagokien orotan. Terrazek garbi egon beharko dute Udaleko garbiketa-zerbitzuak igaro baino lehen.

Udaltzaingoak ordutegi hori betetzen dela zainduko du, bereziki sartzeko atea zezenen entzierroaren ibilbidean daukaten lokaletan, horiek 06:00etarako itxita egon beharko baitute, jendez husturik eta merkataritza-jarduerarik gabe, ez establezimenduen barrenean, ez horien kanpoaldean ere. Lokal horiek ezin izanen dute zaborra kalera atera hondakinen gaueko bilketako zerbitzua pasa eta gero. Lokal horiek ezin izanen dira goizeko 09:00ak baino lehen ireki.

Segurtasun-arrazoiak direla medio, uztailaren 6an, 10:00etatik 13:00etara, Udaletxe plazara, Calceteros kalera eta Txupinazoaren eraginpean diren kaleetara ematen duten fatxadak dituzten establezimenduek orok –ostalaritzakoek barne– itxita egon beharko dute.

1.18.- Establezimenduetan orotan debekaturik dago musika erreproduzitzeko instalaziorik paratzea eremu publikoan edo eremu publikorantz zuzenduta, salbu, eskaria egin eta tokiaz eta bizilagunendako izan dezakeen eraginaz den bezainbatean bertako baldintzak ikusita, espresuki horretarako baimena ematen bada, eta, betiere, kasuan-kasuan ezarritako baldintza berezien menpe, ordutegiei eta soinu-mailari dagokienez. Eremu publikoan musika erreproduzitzea elkarren ondoan dauden lokalei baimenduz gero, guztiek musika bera paratu behar dute.

Debekatuta dago fatxadako itxitura-elementuak zabaltzea musika-jarduera duten lokaletan, bai eta soinu-mailari buruz irekitzeko lizentziaren baldintzetan ezarritakoa ez betetzea ere. Irekitzeko lizentzian musika paratzeko baimena berariaz adierazita ez duten merkataritzako establezimenduek ezin izanen dute musikarik paratu.

Merkataritzako establezimenduek debeku dute jarduera jakin baterako udal-lizentziarik edo, bestela, erantzukizuneko aitortpenik gabe horretan aritzea, haien lizentziako baldintzak aldatzea eta, bereziki, fatxadako itxitura-arotzeria irekitzea.



Bezeroetan gehienak adingabeak dituzten merkataritzako establezimenduek ezin izanen dute saldu edari alkoholodunak.

Edari alkoholodunak saltzea baimenduta duten merkataritzako establezimenduek ezin izanen dituzte haiek modu zatikatuan saldu. Debeku honek barne hartzen du izotza bera, hori ere ontziturik saldu beharko baitute.

1.19.- Jar daitezkeen zehapenak deusetan galarazi gabe, 1.3 eta 1.7 zenbakietan ezarritakoa urratuz gero, lokala berehala itxiarazi eta prezintatu ahalko da; eta 1.5, 1.6, 1.7, 1.8 eta 1.9 zenbakietan xedaturikoa bete ezean, salgaiak konfiskatu ahalko dira zer gerta ere, eta, horretaz gain, elikagai edo edariak badira, desegin ahalko dira, hori guztia kasuan-kasuan eskudunak diren udal-alorrek proposatuta.

1.20.- Taberna eta kafetegietako terrazak. Hala urtean zehar baimena duten terrazaren azalera handitzeko nola sanferminetan soilik irekitzen direnak paratzeko, berariazko baimena eduki beharko da. Baimen hori Herritarren Seguritasuneko eta Elkarbizitzako Alorrak bideratuko du, horretarako eskabidea jaso ondoren. Bi kasuetan, hala handitzekoan nola berritik paratzekoan, gai honetan indarra duen ordenantza fiskalak ezarritako tasak aplikatuko dira.

1.21.- Terrazek okupatutako espazioa eta horietako altzariak baldintza egokietan mantendu behar dira, higienerari eta osasungintzari dagokienez. Ezein kasutan ere ez zaie oztopatuko larrialdi- edota garbiketa-zerbitzuetako ibilgailuei terrazetan barna pasatzea.

1.22.- BBBPBek araututako ostalaritzaren inguruko jardueren kasuan, haien itxiera-ordutegia izanen da 1.17 puntuan taberna eta kafetegientzat ezarritako berbera.

BIGARRENA

ZIRKULAZIOA

2.1.- ORO HAR

Sanferminetan oinezko eta ibilgailu gehiago ibiltzen dira, eta horrek izugarri zailtzen du zirkulazioa. Horregatik, festek iraun bitartean, ezohiko neurriak hartzen dira zirkulazio-handitze horren ondorioz –zeina asteburuetan izugarri handitzen baita– sortzen ahal diren arazoak ahal den neurrian arintze aldera.

Sanferminetan, aparkatze arautua martxan izanen da hiriko eremu askotan, eta ezaugarri ezberdinak izanen ditu urtean zehar izaten direnekin alderatuta. Horrekin, aparkatze zentzuzkoagoa eta antolatuagoa lortu nahi da.

Udaltzaingoak unean-unean egoki jotzen dituen baldintzak eta mugak ezarriko ditu festetan eremu publikoan izaten diren jarduera guztiak (peñen ibilbideak, txarangak, bandak, ospakizunak, etab.) errazteko.

Hala oinezkoek nola ibilgailuen gidariek zehatz-mehatz bete beharko dute zirkulazio-araudia, eta men egin beharko diote beti Udaltzaingoak ematen ahal dituen jarraibideei.



2.2.- APARKATZE ARAUTUA.

San Fermin festetan, uztailaren 5eko 00:00etatik 14ko 24:00etara, aparkatze arautua ezarriko da hiriko alde askotan, eremu laranja gisa, eta bertan tiketa hartzen ahalko da, gehienez ere, 24 ordurako. Eremuak honako alde hauek hartzen ditu: eremu arautuko gaur egungo 2. sektorea (Bigarren Zabalgunea, Nafarroa Behereko, Oliveto Kondearen eta Armada etorbideetatik hegoaldera) Milagrosa eta Azpilagañako sektorea, 4. sektorea (Iturrama), 5. sektorea (Ermitagaña, Mendebaldea eta Ipar Etxabakoitz), 6. sektorea (Donibane) eta 7. sektorea (ospitaletako aparkalekua). Eremua behar bezala seinaleztaturik egonen da, zutikako seinaleetan, non jasoko baita eremu laranja dela eta gehienez 24 orduz aparka daitekeela. Eremu horretako parkimetroetan ere jasoko dira dagozkien argibideak, eta eremu laranja aplikatu beharreko tarifaren tiketak baino ez dituzte emanen.

2.3.- Aparkatze murriztua.

Halaber, uztailaren 5eko 00:00etatik 14ko 24:00etara, Nafarroa Behereko, Oliveto Kondearen eta Armada etorbideen eta 1. sektoreko mugaren (Alde Zaharra) arteko eremuan, aparkatzea baimenduta dagoen lekuetan aparkatzen ahalko dute bakarrik 1. zein 2. sektoreetako txartela duten bizilagunek. Sektore horietako bizilagunentzako eremu murriztuak izanen dira, baita ere, honako hauek: Larraina elkartearen ingurua, Julián Arteaga, Sandoval eta Navas de Tolosa kaleak.

Aipatu eremu horiek zirkulaziorako itxita egonen dira (salbu ibilgailu baimenduak) uztailaren 5eko 08:00etatik uztailaren 15eko 14:00etara.

Uztailaren 7tik 14ra, hau izanen da zamalanetarako ordutegia, eremu horietan: 09:00 – 13:00 eta 15:00 – 17:00.

2.4.- Alde Zaharra.

Zirkulaziorako itxita egonen da uztailaren 5eko 08:00etatik uztailaren 15eko 14:00etara. San Domingoko baratzeen aldean, Andre Maria Erreginaren plazan, Taconera kalean eta Natación klubaren bidean, 1. sektoreko txartela duten bizilagunek aparkatzen ahalko dute, betiere kontuan hartuta zenbait muga izanen dituztela sartu eta irteteko, festa-ekitaldi jakin batzuek direla medio (Entzierroa, Entzierrilloa, etab.).

Gaseko eskorten ondoko aparkalekua 1. sektoreko bizilagunek baino ezin izanen dute erabili.

Uztailaren 5eko 08:00etatik uztailaren 15eko 14:00etara bertan behera geratuko da Alde Zaharrera sartzeko eta bertan zirkulatzeko arauen aplikazioa, 2017ko urriaren 4an Herritarren Seguritasuneko eta Elkarbizitzako Alorreko zinegotzi ordezkariak onetsia.

Uztailaren 7tik 14ra, hauxe izanen da zamalanetarako ordutegia: 9:00 – 13:00 eta 15:00 – 17:00. Bestalde, uztailaren 6an, hau izanen da ordutegia: 7:00 – 10:00 eta 15:00 – 17:00.

Udaletxe plazan, uztailaren 6an, 07:00etatik 10:00etara bakarrik egin ahalko dira zamalanak.



Uztailearen 7an, 15:00etatik 17:00etara bakarrik egiten ahalko dira zamalanak honako kale hauetan: Kale Nagusia, San Saturnino, Curia, Mercaderes, Udaletxe plaza, San Anton, Zapatería eta Calceteros.

Uztailearen 14an, 15:00etatik 17:00etara bakarrik egiten ahalko dira zamalanak Kale Nagusian, San Saturninon eta Udaletxe plazan.

Debekutik salbuetsita daude Iruñeko Mankomunitateko hiri-garraioa, lanean ari diren taxiak, polizia-ibilgailuak, anbulantziak, suhiltzaileak eta beste udal-zerbitzuak, bai eta Udaltzaingoren berariazko eta idatzizko baimena dutenak ere.

2.5.- Aparkatzeko guneak.

Toki-kopuruagatik, hauek dira gunerik garrantzitsuenak:

- Zezen-plazako lurpeko aparkalekua (ordainpekoa).
- Nafarroako Blanca plazako lurpeko aparkalekua (ordainpekoa).
- Aduanako zokoko lurpeko aparkalekua (ordainpekoa).
- Karlos III.aren etorbideko lurpeko aparkalekua (ordainpekoa).
- Auzitegiko lurpeko aparkalekua (ordainpekoa).
- Gazteluko plazako lurpeko aparkalekua (ordainpekoa).
- Autobus-geltokiko lurpeko aparkalekua (ordainpekoa).
- Baluarteko lurpeko aparkalekua (ordainpekoa).
- Ospitaleetako lurpeko aparkalekua (ordainpekoa).
- Trinitarioseko aparkalekua, Udalaren ibilgailu-biltegi zaharrean.
- Nafarroa etorbideko aparkalekua, Biurdana kaleko eta hilerrira biderako errepideko biribilgunearen ondoan.
- Mendebaldeko aparkalekua, Liburutegiaren ondoan.
- Cuatrovientosko aparkalekua.
- Aróstegui etorbideko aparkalekua, Venta Andrésen ondoan.
- Zaragozako etorbidearen eta Azpilagañaren arteko aparkalekua.
- Lezkairu eta Arrosadiko eremu urbanizatuak.
- Sadar kaleko aparkalekua.
- Anelier pasealekuko orubea, Arrotxapeko bulebarrean.
- Taxoare kaleko aparkalekua.
- María Ana Sanz ikastetxearen patioko aparkalekua.

Karabanak eta autokarabanak.

Debekaturik dago karabanak aparkatzea Iruñeko udal-mugapeko eremu publikoan. Debeku da, baita ere, autokarabanak aparkatzea etxebizitza gisara erabiltzeko, Trinitarioseko autokarabana-aparkalekuan izan ezik.

Debeku horretatik salbuetsita dago, halaber, Trinitarioseko orubea, horretarako egokitu eta Erruki Etxeari laga baitzaio, egun hauetarako, bertan aparka ditzaten beren karabanak eta etxebizitza-ibilgailuak Runa parkean feria-atrakzioak jartzen dituzten pertsonak.



Gaizki aparkatutako ibilgailuei salaketa jarriko zaie, eta, hala badagokio, Udalaren garabi zerbitzuak eramanen ditu, betiere Bide Segurtasunari buruzko Legean, Zirkulazioaren Erregelamendu Orokorrean, Trafikoaren Udal Ordenantzan eta Aparkatze Mugatuko eta Murriztuko Eremuak arautzen dituen Ordenantzan ezarritakoarekin bat.

2.6.- ALDI BATERAKO ETENALDIAK IBILGAILUEN ZIRKULAZIOAN

Gaztelugibel kalea –Ezkirotz kaletik Foruen plazara bitarte–, Armada etorbidea, Conde Oliveto, Yanguas y Miranda eta Zaragozako etorbidea –Vianako Printzearen plazatik Zangoza kalearekiko bidegurutzera bitarte– itxita egonen dira zirkulaziorako 22:30etik 24:00etara, su artifizialak direla medio.

Zezenketak egin bitartean, 17:45etik 18:45era, Leire eta Arrieta kaleak zirkulaziorako itxita egonen dira Erriberri eta Amaia kaleen arteko zatian.

HIRUGARRENA

FATXADA, BALKOI ETA ANTZEKOEN SEGURTASUNA

3.1.- Jende ugari biltzen duten ekitaldietan (entzierroa, prozesioa, txupinazoa eta abar), fatxada haietara begira duten eraikinen jabe edota erabiltzaileak haien segurtasunaren erantzule dira, legeek xedatutako eran.

3.2.- Halakoen titularrek baldintza onetan eduki beharko dituzte fatxadak eta balkoiak, eta zaindu, kasu bakoitzean balkoietan behar baino jende gehiago izan ez dadin. Halaber, haien erabilpena eragotzi beharko dute, erabat bermaturik ez badute kontserbazio- eta segurtasun-baldintzak betetzen dituztela.

3.3.- Inor ezin izanen da paratu eraikinetako teilatuetan eta desegoki diren egituretan, haietatik erortzeko arriskurik badago. Hori bete ez eta ustekabekoren bat gertatuz gero, eraikinen jabeak edo erabiltzaileak izanen dira etor litezkeen kalteen erantzule.

3.4.- Baimen berezi eta berariazkorik izan gabe ezin izanen da balkoi edo fatxadetan egiturarik paratu edo elementurik muntatu, are gutxiago jende asko biltzen duten ekitaldietara begira dauden fatxadetan, horrek hirugarrenei ekartzen ahal dizkien kalte eta arriskuengatik.

3.5.- Kasuan-kasuko udal-zerbitzu teknikoek fatxada eta balkoien segurtasunari buruzko neurriak hartu ahalko dituzte, eta –halakorik behar izanez gero, arriskugarriak direla irizten diotelako– zenbait balkoi eta instalazio itxi ahalko dituzte behin-behineko premiazko neurri gisa.

3.6.- Txupinazoaren jaurtiketaren eraginpean dagoen aldean izaten den jende-pilaketa dela medio, bertan kokaturik dauden lokalen arduradunek prebentzio-neurri egokiak hartu beharko dituzte leihate eta hutsuneei dagokienez, pertsonengan kalterik gerta ez dadin.

3.7.- Entzierroaren ibilbideak hartzen dituen kaleetan kokaturik diren etxabeek eta lokalek behar bezalako babesa eduki beharko dute, eta horretarako, haien jabe eta erabiltzaileek segurtasun-neurri egokiak hartu beharko dituzte entzierroak iraun bitartean, betiere ohartarazita halakorik egin ezean ezin izanen dutela erreklamatu ordainik haien ondasunetan izan litezkeen kalteengatik, eta beraiek izanen direla hirugarrenei eragin lekizkiekeen kalteen erantzule.



Besteak beste, neurri bereziak hartuko dira ibilbidera begira dauden irtenguneak kendu edo behar bezala babesteko, halakoek korrikalariak erortzeko arriskua sortzen badute edo haientzako babestoki aizunak badira.

LAUGARRENA

TXUPINAZOA

Arau orokorrak:

4.1.- Ekitaldi honetan ahalik eta arriskurik gutxien izateko, debekatuta dago Udaletxe plazara eta Gazteluko plazara honako hauek eramatea: makilak, beirazko ontziak eta edalontziak, ireki gabeko edaripotoak eta zuzenean edo zeharka kalterik eragiten ahal duten beste edozein elementu.

4.2.- Plazako fatxadak zikintzea eragozteko, eta ekitaldia normaltasunez gauzatze aldera, debekatuta dago Udaletxe plazara eta Gazteluko plazara honako hauek eramatea: arrautzak, pinturaz betetako puxikak edo antzeko objektuak –fatxaden kontra jaurti eta fatxadak zikintzeko eta ekitaldia desitxuratzeko balia badaitezke–.

BOSGARRENA

ENTZIERROA

Arau orokorrak:

5.1.- Entzierroa San Domingoko eskortetatik abiatu, eta Zezen-plazako eskortetan amaituko da, San Domingo kaletik, Udaletxe plazatik eta Mercaderes eta Estafeta kaleetatik igarota.

5.2.- Entzierro guztiak 08:00etan hasiko dira, ezinbesteko kasuetan salbu. Suziri bat jaurtiko da San Domingoko eskorten atea ireki baino lehen; beste bat, eskorta horietatik azken zezena irteten denean; hirugarren bat, zezen guztiak zezen-plazan sartutakoan; eta azkena, azken zezena Zezen-plazako eskortetan sartu ahala.

5.3.- Entzierroan parte hartzen dutenek ahalik eta arriskurik txikiena izateko, ekitaldia arautzen duten segurtasun-neurriak ahalik eta zorrotzen bete behar dira, halako moldez non men egin beharko baitzaie beti hura zaintzeko eta erregulatzeko ardura duten langileen oharpenei, bai eta haren gainean sanferminetarako udal bandoan urtero zehazten diren xedapenei ere.

Parte-hartzaileek bereziki erreparatu beharko diete unaiek ematen dituzten aginduei, haiek baitira zezen-taldea gidatzeko ardura duten pertsonal teknikoa; ez dute haien jarduna oztopatu behar eta men egin behar diete haien jarraibideei, itzuri eginez haien lan arriskutsua eragoz dezakeen egoera orori.

5.4.- Lasterketan parte hartzera doazenak Udaltzaingoak eta Foruzaingoak zehaztuko duten tokietan kokatuko dira, eta ibilbidearen gainerako parteak hutsik geldituko dira. 07:30etik aurrera, bakarrik korrikalariak egon ahalko dira ibilbidean –haientzat gordetako tokian–, eta pertsona baimenduak.

Korrikalariak Iruñeko Udalak ezarriko dituen tokietatik eta orduetan sartuko dira ibilbidera. Korrika egin nahi dutenak inola ere ezingo dira sartu ibilbidera 07:30ak jo eta gero. Sarbideak



kontrolatuko dituzten Polizia-agintariak ordu hori baino lehenago itxi ahalko dituzte haiek, baldin eta jotzen badute korrikalarien kopurua aski dela dagoen lekurako.

Halaber, sarbideak kontrolatuko dituzten polizia-agintariak, beharrezkoa izanez gero, 07:15ean ixten ahalko dituzte sarbide horiek, kasuan kasuko eraikinerako joateko xedez entzierroaren ibilbidean sartu behar diren pertsonen sarrera kontrolatuz.

5.5.- Lasterketan parte hartzen dutenek orok kasu eman behar diete Poliziak eta entzierroan esku hartzen duen pertsonal teknikoak emandako oharpenei, eta ibilbidetik irten, hesien arteko guneeetatik alde egin edo beste edozein gauza egin beharko dute, hala giteko eskatzen bazaie.

5.6.- Hemezortzi urte baino gutxiagokoek ezingo dute parte hartu entzierroan, eta debekaturik edukiko dute ibilbidean gotea 07:15etik entzierroa bukatu arte.

5.7.- Zenbait tokitan bi hesien artean dagoen guneeetan, Iruñeko Udalaren horretarako baimena dutenak baizik ezin izango dira egon; horiek dagozkien baimen eta egiaztagiriak agerian eraman beharko dituzte, eta halako agirietan adierazitako baldintzak zein zerbitzuko poliziek ematen ahal dizkieten aginduak bete. Gainerakoak istantean kanporatuko dituzte.

Entzierroa egin bitartean gune horiek gordeta daude beren burua ataka larrian ikusten ahal duten korrikalariarentzat, babesgarri izan dezaten.

5.8.- Sarbidea entzierroaren ibilbidean duten ostalaritzako zein merkataritzako beste edozein jarduerarako establezimenduek 06:00etan itxita eduki beharko dute hura, halako eran non inor ezingo baita haietara sartu edo haietatik irten. Edonola ere, itxitura-mota eraginkorra izango da. Fatxada ibilbidera begira duten establezimenduek ezin izango dute piztuta eduki ibilbidetik ikusteko moduko ezin pantaila erreproduzitzailerik.

Sarbidea entzierroaren ibilbidean duten establezimenduetan, egunkariak bakarrik saltzea baimendu ahalko da, betiere ordutegi mugatuan: 07:00etara arte, hutsik utzi beharreko guneeetan, eta 07:30era arte, entzierroan parte hartu behar duten korrikalariak dauden tokietan. Horretan interesa dutenek baimena eskatu beharko dute, eta Herri Segurtasuneko eta Elkarbizitzako Alorrak emango die baimen hori.

5.9.- Sarbidea entzierroaren ibilbidean duten etxebizitzaren atariak itxita egon beharko dute 07:15etik aurrera, halako eran non ezin izanen baita haietara sartu. Ordu horretatik aurrera, inor ez da egongo halako atarietan, eta inor ez da aterako haietatik entzierroaren ibilbidera.

5.10.- Entzierroaren ibilbidearen garbitasuna funtsezkoa da korrikalarien segurtasuna areagotzeko, eta, horregatik, garbiketa-lanak ez dira inola ere oztopatuko horretan ari diren ibilgailuen zirkulazioa edo langileen zereginak eragozten ahal dituzten jokabideekin.

5.11.- Behin garbiketa-zerbitzua igaro eta gero, ezin izango da atera zaborrik edota beirarik, ez entzierroaren ibilbidera ez horren zeharkako kaleetara ere (Telleria eta Xabier kaleak eta Espoz y Mina zeharkalea).

5.12.- 07:00etatik aurrera ezin izanen da musika zuzendu entzierroaren ibilbiderantz, Udalaren baimenarekin ez bada.



5.13.- Erabat debekatzen dira, eta segurtasun-ingar eta -kidegoek salatuko dituzte, honako jokabide hauek:

- Zenbait elementuren gainean igotzea, hala nola, fatxada, hiri-altzari, zuhaitz, farola eta abarretara, halakoak entzierroaren ibilbidean egonda ala ez.

- Entzierroaren ibilbidearen espazio bertikala, horizontala edo airekoa hartzen duen edozein elementu instalatzea, salbu Iruñeko Udalak berariaz baimentzen badu.

- Norbera kokatzea Ordenantza honek, Alkatetzak sanferminetarako ematen duen Bandoak edo segurtasun -ingar edo -kidegoetako kideek berariaz debekatzen dituzten ibilbideko toki edo gunetan.

- Gainez egitea segurtasun-ingar edo -kidegoetako agenteek ibilbideko zenbait gunetan ezarriko dituzten hesiak eta mugak.

- Irekita edukitzea ibilbidera ematen duten eraikin eta lokalen ate eta atariak, horiek ixteko ezarritako orduen ondoren. Horren gainean erantzule izanen dira halakoan jabeak, erabiltzaileak, errentariak edo titularrak.

- Ibilbidean mozkor egotea, edo drogen zein estupefazianteen eraginpean, edota egoera fisikoa eta psikikoa ona ez dela.

- Janzteia korrika egitea galarazten ahal duten jantziak edo korrika egiteko desegokiak diren oinetakoak: zapata takoidunak, txankletak, sandaliak, eskalapoiak, etab.

- Objektuak jaurtitzea entzierroaren ibilbidean, hura garbitu eta gero.

- Soinean eramatea entzierroaren ordena egokiaren eta segurtasunaren kontrakoak diren objektuak, adibidez, honelakoak: bizkar-zorroak, poltsak, botilak, edalontziak, makilak, argazki- edo bideo-kamerak, mikrofonoak, irudiak grabatzeko gailuak...

- Zezenengana korrika egitea, edo haien atzean, egoera arriskutsuak sortuta.

- Zezenak ukitzea edo haien arreta erakartzea, edozein maneratan eta edozein arrazoirengatik, ibilbidean nahiz zezen-plazan bertan, eta bereziki zezenen adarrei heltzea eta zezenak ukitzea, ez bada harrapaketa bat galarazteko.

- Unaien aginduei kasurik ez egitea edo haien lan-jarduna eragozteia.

- Ibilbidean gelditzea eta hesietan, babesgarrietan edo atarrietan egotea, gainerako korrikalarien lasterketa edo babesa oztopatuz.

- Zain egotea, zezenak irten aurretik, entzierroaren ibilbidean barnako zoko, guneitsu edo etxe nahiz establezimenduetara sartzeko atarrietan.

- Irudiak edota soinua grabatzeko edozein euskarri erabiltzea, telefonia mugikorreko gailuak barne, ibilbidean edo erreserbatutako hesietan, horretarako baimena izan gabe.



- Entzierroaren gainean baimenik gabe hegan egitea, aparatua edozein delarik ere.

- Entzierroan parte hartzea mugitzeko elementu mekanikoak eramanda (irristailuak, skateboardak, bizikletak, etab.).

- Hirian, 07:00etatik 08:30era bitartean, botatzea hala suziriak eta petardoak nola entzierroko suzirikin nahasi eta korrikalariengan zein ikusleengan urduritasuna sor dezaketen artifizio piroteknikoak oro.

- Beste edozein jokaera, baldin eta entzierroa normaltasunez egitea oztopatzen badu, edo Entzierroaren Udal Ordenantzan zein bando honetan xedatutakoaren kontra badoa.

Inork debekatutako gauzetatik edozein egiten badu, entzierroaren ibilbidean egonda, berehala kanporatuko dute agintaritzaren agenteek, eta haren jokaera dela bide salatuko dute.

5.14.- Ikusleak horretarako prestatutako tokietan egongo dira, eta beti eginen die men entzierroaren segurtasunaren ardura duten poliziek ematen ahal dizkieten aginduei. Ez dira, ezein kasutan ere, hesien arteko guneeetan kokatuko.

SEIGARRENA

TXULIAKETAK EDO BIGANTXAK

6.1.- Entzierroaren ondoren Zezen-plazan izaten diren bigantxa-ekitaldian –txuliaketan–, debeku da animaliei eutsi, haiek astindu edo jotzea, baita oztopoak paratzea ere haiek hondarretik ateratzeko edo kortara erretiratzeko.

6.2.- 18 urtetik beherakoek debeku dute ekitaldi horietan parte hartu edota hondarrean egotea, eta hori ez betetzearen erantzukizuna haien guraso edo legezko tutoreei egotziko zaie.

ZAZPIGARRENA

ENTZIERRILLOA

7.1.- Entzierrilloa egiten ari den bitartean, eta zezen-taldea ez despistatzeko, ezin izanen da argazki-makinetako flashik erabili.

7.2.- Eskortetan eta entzierrilloaren ibilbidean, hantxe egoteko baimena duen pertsonal teknikoa baizik ez da egonen. Langile horiek Erruki Etxeak izendatuko ditu, eta behar bezalako bereizgarriak eramanen dituzte, Udalak emanda.

7.3.- Hesi, ate eta zezenak maneiatzen, langile tekniko horiek arituko dira, behar bezala baimendurik eta identifikatuta, eta ez beste inor.

7.4.- Entzierrilloa eremu publikotik ikusteko, ikusleek horretarako emanen diren baimen-txartelak eskuratu beharko dituzte, eta mesetak deitutakoak kasu berezietarako erreserbatuko dira, betiere Herritarren Segurtasuneko eta Elkarbizitzako Alorrak araututakoaren arabera.



7.5.- Uztailaren 6tik 13ra, 21:45etik 22:15era, Runa parkeko Feria-lekuan musika eten beharko da eta altuera handiko aparatuetako argiak itzali beharko dira, bai eta Entzierrilloaren jarduna modu egokian egitea oztopatzen ahal duten jarduerak eten ere.

7.6.- Descalzos kaleko igogailua ez da ibiliko 21:30etik entzierrilloa bukatu arte.

ZORTZIGARRENA

ZALDI-AZIENDAKO FERIA

8.1.- Zaldi-aziendako Feria uztailaren 7an egingen da, Agustinos industrialdearen orubean, Eroski hipermerkatuaren ondoan.

8.2.- Ferian parte hartzen dutenek indarrean izan beharko dituzte mota honetako jardueretan aplikagarri den araudiak eskatutako agiri guztiak.

8.3.- Debekaturik dago salmenta ibiltariko postuak paratzea elikagaiak eta edariak saltzeko. Herritarren Segurtasuneko eta Elkarbizitzako Alorrak emandako baimena duten salmenta-postuak baino ezin izanen dira jarri, betiere zaldi-aziendako feriarekin loturiko produktuak saltzeko.

8.4.- Debekaturik dago zaldi-espeziarena ez den beste edozein animalia erakutsi edo saltzea.

8.5.- Debekaturik dago orubean animaliak geratzea behin feria amaituta.

BEDERATZIGARRENA

AGINTARITZAREN AGENTEAK ETA ZERBITZUKO FUNTZIONARIOAK

Hala agintaritzaren ordezkarietara eta zerbitzu publikoko eginkizunetan ari direnei eraso, mehatxu, aurre egin eta desobeditzea nola identifikatzeko agindutakoan horri uko egitea indarra duen legerian aurreikusitako eran jazarriko dira, eta, behar izanez gero, halakoak egiten dituztenak atxilotu eta epailearen esku utziko dituzte.

HAMARGARRENA

“PAMPLONA LIBRE DE AGRESIONES SEXISTAS/ERASO SEXISTARIK GABE, IRUÑA ASKE” ESTRATEGIA

Jazarri egingen dira, eta zehatu emakumeen kontrako eraso sexistak oro, emakumeen adina eta erasoaren inguruabarrak edozein direlarik. Iruñeko Udalak, “Pamplona libre de agresiones sexistas/Eraso sexistarik gabe, Iruña aske” strategiaren bidez, gonbit egiten die herritarrei modu aktiboan jardun dezaten emakumeen kontrako erasoei aurre egiteko, eta eraso jasandako emakumeari sorospen eta laguntza eman diezazkieten zein erasotzailea isola dezaten. Hori horrela, gogora dakarkigu Udalak hartutako engaiamendua, halako erasoak ez jasateko eta horiek jazartzeko, betiere xede harturik emakumeek aukera edukitzea sanferminez modu aske eta seguruan zein berdintasunean gozatzeko.



Hiriak duen jarrera irmo horrekin bat, debeku da mezu edo lelo sexistak dituzten materialak (kamisetak, txapak, etab.) saltzea. Halako salmentarik hautemanez gero, material horiek erretiratzeko agindua ematen ahalko da, eta atzemanak izan gero itzuli gabe. Neurri honen bidez denon erantzukizuna sustatu nahi dugu eraso sexistarik gabeko festak edukitze aldera.

HAMAIKAGARRENA

ZEHAPENAK

11.1.- Bando honetan eta aplikagarri diren gainerako arauetan xedatutakoa ez betetzea indarra duten legeek onartzen duten gogortasunik handienarekin zehatuko da, betiere kontuan harturik festetako inguruabarrak, haietara jendetza handia elkartzen dela eta arriskuak ere metatu egin ohi direla.

11.2- Hona Bando honetan zehazten diren gaitan arau-hausteak, zehapenak eta horien zenbatekoak xedatzen dituzten arauetako batzuk:

- 2/1995 Foru Legea, martxoaren 10ekoa, Nafarroako Toki Ogasunei buruzkoa
- 1/2015 Lege Organikoa, martxoaren 30ekoa, Zigor Kodeari buruzko azaroaren 23ko 10/1995 Lege Organikoa aldatzen duena
- 14/1986 Lege Orokorra, apirilaren 25ekoa, Osasungintzari buruzkoa
- 22/2011 Legea, uztailaren 28koa, Hondakinei buruzkoa
- 10/1990 Foru Legea, azaroaren 23koa, Osasunari buruzkoa
- 4/2005 Foru Legea, martxoaren 22koa, Ingurumena Babesteko Esku-hartzeari buruzkoa
- 7/2006 Foru Legea, ekainaren 20koa, Kontsumitzaile eta Erabiltzaileen Defentsari buruzkoa
- 6/2015 Legegintzako Errege Dekretua, urriaren 30ekoa, Trafikoari, Ibilgailu Motordunen Zirkulazioari eta Bide Segurtasunari buruzkoa
- 35/2002 Foru Legea, abenduaren 20koa, Lurraldearen Antolamenduari eta Hirigintzari buruzkoa
- 16/1987 Legea, Lurreko Garraioen Antolamenduari buruzkoa
- 4/2015 Lege Organikoa, martxoaren 30ekoa, Herritarren Segurtasunaren Babesari buruzkoa
- 10/1991 Foru Legea, martxoaren 16koa, adin txikikoei alkoholodun edariak kontsumitzea galarazi eta mugatzeari buruzkoa
- 2/1989 Foru Legea, martxoaren 13koa, Ikuskizun Publiko eta Josteta Jardueri buruzkoa
- 2/1989 Foru Legea, martxoaren 13koa, Ikuskizun Publiko eta Josteta Jardueri buruzkoa
- 7/1994 Foru Legea, maiatzaren 31koa, Animalien Babesari buruzkoa
- 50/1999 Legea, abenduaren 23koa, Arriskugarri gerta daitezkeen animaliak edukitzeko araubideari buruzkoa
- 132/2002 Foru Dekretua, ekainaren 17koa, Tatuajeak edo piercingak egiten dituztenek bete behar dituzten osasun- eta higiene-baldintzei buruzkoa
- 28/2005 Legea, abenduaren 26koa, Tabakismoaren kontrako osasun-neurriak finkatu eta tabako-produktuen salmenta, hornidura, kontsumoa eta publizitatea arautzen dituen
- 16/2006 Foru Legea, abenduaren 14koa, Jokoari buruzkoa, 18/2015 Foru Legeak aldatua
- 1341/2007 Errege Dekretua, urriaren 11koa, Bainatzeko uren kalitatea kudeatzeari buruzkoa
- 56/2013 Foru Dekretua, abuztuaren 28koa, Nafarroako Foru Komunitateko Jatetxeak eta Kafetegiak Antolatzeko Erregelamendua onesten duena
- Gizalegezko jokaeren sustapenari eta espazio publikoen babesari buruzko Udal Ordenantza
- Aparkatze mugatuko eta murriztuko eremuak arautzen dituen Ordenantza.
- Entzierroaren Udal Ordenantza



- Autokarabanetarako Iruñeko zerbitzugunean autokarabanak edo etxebizitza-ibilgailuak aparkatzea eta gaua pasatzea arautzen dituen Udal Ordenantza
- Higieneari eta Osasungintzari buruzko oinarritzko Ordenantza
- Udalaren gainerako ordenantzak.

HAMABIGARRENA

AZKEN XEDAPENA

Alkatetza honek espero du iruindarrek eta bisitariek gizatasunez jokatuko dutela, eta lagunduko dutela Sanferminak giro onean ospa daitezen.

GOZA DEZAGUN GURE HIRIAREKIN ETA FESTEKIN, BEHAR DEN ARDURA GEURE GAIN HARTUTA.»

----- PROPOSAMENAREN BUKAERA -----